



JABATAN KEMAJUAN ISLAM MALAYSIA

TEKS KHUTBAH

Tajuk :

“MENGHAYATI RUKUN NEGARA”

Tarikh Dibaca :

**18 MUHARRAM 1443H/
27 OGOS 2021M**

Disediakan oleh :

Jabatan Kemajuan Islam Malaysia

**“MENGHAYATI RUKUN NEGARA”****(27 OGOS 2021 / 18 MUHARRAM 1443H)**

الْحَمْدُ لِلَّهِ الْقَائِلِ:

قَالَ تَعَالَى: أَعُوذُ بِاللَّهِ مِنَ الشَّيْطَانِ الرَّجِيمِ ﴿يَأَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ

وَأُولَى الْأَمْرِ مِنْكُمْ فَإِن نَّزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِن كُنتُمْ تُؤْمِنُونَ بِاللَّهِ وَالْيَوْمِ

الْآخِرِ ذَلِكَ خَيْرٌ وَأَحْسَنُ تَأْوِيلًا ﴿٥٩﴾ النساء: ٥٩

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ، اللَّهُمَّ

صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَمَّا بَعْدُ، فَيَا عِبَادَ اللَّهِ اتَّقُوا اللَّهَ أَوْصِيكُمْ وَنَفْسِي بِتَقْوَى اللَّهِ فَقَدْ فَازَ الْمُتَّقُونَ.

SIDANG JUMAAT YANG DIRAHMATI ALLAH,

Saya ingin mengingatkan diri dan sidang jemaah sekalian, marilah kita tingkatkan keimanan dan ketakwaan kepada Allah SWT dengan melaksanakan suruhan-Nya dan meninggalkan larangan-Nya di samping berusaha mencari kehidupan yang diberkati dan diredhai oleh Allah SWT. Mudah-mudahan kita berjaya menjadi insan yang beruntung di

dunia dan di akhirat. Bersempena dengan Hari Kebangsaan yang Ke-64 negara kita, khatib pada hari ini akan membicarakan khutbah bertajuk: **“Menghayati Rukun Negara”**.

Mimbar juga ingin berpesan kepada sidang jemaah sekalian agar sentiasa mematuhi garis panduan dan SOP pencegahan penularan wabak Covid-19 yang telah dikeluarkan oleh pihak berkuasa. Teruskanlah memohon keampunan dan bermunajat kepada Allah SWT agar diangkat segera wabak ini. Bagi yang telah mendaftar dan mendapat janji temu suntikan vaksin Covid-19, pastikan anda hadir ke Pusat Pemberian Vaksin (PPV) pada tarikh dan masa yang telah ditetapkan. Manakala bagi yang belum mendaftar pula, segeralah berbuat demikian kerana ini antara ikhtiar kita untuk menyekat penularan wabak berbahaya ini di samping mencapai tahap imuniti berkelompok

SIDANG JUMAAT YANG DIRAHMATI ALLAH,

Alhamdulillah, kita bersyukur kepada Allah SWT kerana Insya-Allah pada 31 Ogos ini kita akan menyambut ulangtahun kemerdekaan ke-64 negara. Sesungguhnya nikmat kemerdekaan ini merupakan salah satu nikmat terbesar yang wajib disyukuri dan dihargai kerana untuk mencapainya bukanlah sesuatu yang mudah. Generasi terdahulu telah mengorbankan seluruh jiwa dan raga mereka dalam memperjuangkan kemerdekaan tanah air tercinta ini. Bagi menghayati maksud kemerdekaan negara, khatib ingin menghuraikan secara ringkas prinsip Rukun Negara dari sudut pandang Islam.

Rukun Negara yang diisytiharkan pada 31 Ogos 1970 sempena ulangtahun kemerdekaan Malaysia Ke-13 ini dibentuk dengan tujuan utama, iaitu membentuk perpaduan kukuh dalam kalangan rakyat dan menjadi identiti rakyat Malaysia. Antara matlamat utama Rukun Negara ialah mewujudkan masyarakat Malaysia ke arah mencapai perpaduan lebih erat dalam kalangan seluruh masyarakat. Pertamanya, Kepercayaan Kepada Tuhan. Sememangnya menjadi fitrah bagi setiap manusia untuk menyembah Tuhan yang mencipta seluruh alam. Bagi kita umat Islam pula, kita meyakini bahawa Allah SWT jualah sebagai Tuhan yang mencipta dan mentadbir seluruh alam ini. Maka segala pengabdian dan penghambaan perlu ditujukan kepada-Nya. Rasa kehambaan ini seterusnya akan membuang segala sifat *mazmumah* seperti sombong, takabbur, dengki, pamarah dan lain-lain sifat negatif dalam diri manusia. Seterusnya, sifat-sifat *mahmudah* seperti jujur,

pemurah, belas kasihan, bertolak ansur, bertanggungjawab dan lain-lain lagi sifat positif akan mengisi ruang jiwa manusia. Dengan suburnya perasaan dan sifat-sifat *mahmudah* dalam diri manusia, ia akan menumbuhkan pula suasana harmoni dalam kalangan masyarakat yang seterusnya akan membina suatu persekitaran yang saling prihatin, bertolak ansur dan saling mengasihi antara satu sama lain.

SIDANG JUMAAT YANG DIRAHMATI ALLAH,

Sebagai sebuah negara yang mengamalkan sistem Raja Berperlembagaan, pastinya kesetiaan dan ketaatan kita perlu disandarkan juga kepada Raja yang memerintah. Kecintaan dan kesetiaan kepada negara juga menjadi rukun kepada pembentukan warganegara yang baik dalam usaha membangun sebuah negara yang berdaulat. Allah SWT juga memerintahkan kita untuk mentaati pemerintah (*Ulil Amri*) sebagaimana firman-Nya dalam Surah al-Nisaa' ayat 59 yang dibacakan pada awal khutbah tadi yang bermaksud:

“Wahai orang-orang yang beriman, taatlah kamu kepada Allah dan taatlah kamu kepada Rasulullah dan kepada "Ulil-Amri" (orang-orang yang berkuasa) dari kalangan kamu. Kemudian jika kamu berbantah-bantah (berselisihan) dalam sesuatu perkara, maka hendaklah kamu mengembalikannya kepada (Kitab) Allah (al-Quran) dan (Sunnah) RasulNya - jika kamu benar beriman kepada Allah dan hari akhirat. Yang demikian adalah lebih baik (bagi kamu), dan lebih elok pula kesudahannya”.

Sebagai rakyat, lebih-lebih lagi kita umat Islam – hendaknya patuh dan taat kepada pemerintah. Tanpa ketaatan kepada pemerintah, bagaimana keharmonian dan matlamat sesebuah negara dapat dicapai? Ketaatan kepada pemerintah ini juga telah digariskan oleh Rasulullah SAW ialah selagimana tidak menyuruh kepada perkara yang mungkar sebagaimana sabda Baginda SAW:

عَلَى الْمَرْءِ الْمُسْلِمِ ، فِيمَا أَحَبَّ وَكَرِهَ ، مَا لَمْ يُؤْمَرْ بِمَعْصِيَةٍ ، فَإِذَا أُمِرَ بِمَعْصِيَةٍ فَلَا سَمْعَ وَلَا طَاعَةَ

Maksudnya: *“Seorang muslim wajib mendengar dan taat dalam perkara yang dia sukai atau benci selama tidak diperintahkan untuk bermaksiat. Apabila diperintahkan untuk bermaksiat, maka tidak ada kewajipan mendengar dan taat”.* **(Hadis riwayat Imam al-Bukhari)**

SIDANG JUMAAT YANG DIMULIAKAN,

Keluhuran Perlembagaan pula bermaksud bahawa setiap rakyat perlu menerima Perlembagaan sebagai sumber undang-undang tertinggi negara dan setiap individu perlu mematuhi keluhurannya. Perlembagaan negara juga merupakan rujukan tertinggi bagi segala hal berkaitan sistem pemerintahan, perundangan, kedudukan dan hak sosioekonomi rakyat. Peranannya ialah untuk memberi perlindungan kepada setiap rakyat tentang hak dan keistimewaan mereka sebagai warganegara. Setiap warganegara dikehendaki menghormati, menghargai dan memahami maksud serta kandungan dan latar belakang sejarah pembentukan Perlembagaan Persekutuan.

Kedaulatan undang-undang pula bermakna kerajaan dan rakyat keseluruhannya terikat oleh undang-undang dan wajib mematuhi undang-undang. Jika dibandingkan antara pentadbiran Islam dengan konsep kedaulatan undang-undang, kedua-duanya tidak banyak berbeza. Islam sebenarnya telah meletakkan garis panduan yang jelas dalam tanggungjawab pemerintah dan rakyat. Sebagai contoh, Islam mensyariatkan perbincangan dalam konsep *syura*. Islam meletakkan tanggungjawab pemerintah untuk menghormati yang diperintah dengan meletakkan hak-hak tertentu dan meletakkan juga tanggungjawab pemerintah untuk taat kepada perintah Allah SWT sebagaimana yang disebutkan tadi.

SIDANG JEMAAH YANG DIRAHMATI ALLAH SEKALIAN,

Prinsip kelima iaitu Kesopanan dan Kesusilaan pula menekankan perkembangan personaliti dan tingkah laku setiap rakyat. Ia bertujuan untuk membentuk warganegara yang bersopan santun dan bersusila. Sifat individu yang bersopan santun dan bersusila adalah paling bermakna dan amat penting dalam konteks perhubungan antara satu sama lain dalam masyarakat majmuk di negara ini. Sikap bersopan santun dan bersusila patut diamalkan bagi membentuk seseorang individu dan masyarakat yang berdisiplin dan

bermoral tinggi yang akan membantu mewujudkan sebuah masyarakat yang harmoni. Dalam Islam, kita telah diajar untuk berakhlak baik kepada sesama manusia. Rasulullah SAW telah menunjukkan contoh teladan baik yang sepatutnya menjadi ikutan umat manusia. Allah SWT berfirman dalam Surah al-Ahzab ayat 21:

﴿لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ وَالْيَوْمَ الْآخِرَ وَذَكَرَ

اللَّهُ كَثِيرًا

Maksudnya: “Demi sesungguhnya, adalah bagi kamu pada diri Rasulullah itu contoh ikutan yang baik, iaitu bagi orang yang sentiasa mengharap (keredhaan) Allah dan (balasan baik) hari akhirat, serta dia pula menyebut dan mengingati Allah banyak-banyak (dalam masa susah dan senang)”.

Justeru, meletakkan nilai yang baik pada tingkah laku, percakapan, dan beradab sopan serta mengikut peraturan menjadi amalan yang dituntut menurut prinsip kelima Rukun Negara ini. Dalam soal ini juga, kepimpinan melalui teladan menjadi salah satu usaha dalam menyemarakkan nilai-nilai murni di samping penekanan dalam sistem pendidikan dan pengaplikasian yang bermula dari institusi kekeluargaan. Jika kita berakhlak mulia, pastinya ia akan menyebarkan nuansa baik kepada persekitaran kita dan akhirnya akan membentuk masyarakat negara yang harmoni, saling menghormati dan bersatu padu mempertahankan negara tercinta.

SIDANG JEMAAH YANG DIRAHMATI ALLAH SEKALIAN,

Begitulah sedikit huraian dari sudut pandang Islam berkaitan lima Prinsip Rukun Negara yang perlu dihayati dan diamalkan. Kita sebagai umat Islam perlu menerapkan nilai-nilai tersebut dalam kehidupan kerana kesemua prinsip Rukun Negara ini bertepatan dengan ajaran Islam yang *syumul*. Para pemimpin, di seluruh peringkat perlu menunjukkan contoh teladan yang baik kepada rakyat yang dipimpin. Bagi rakyat pula, ketaatan dan kesetiaan kepada negara perlu dizahirkan dengan ikhlas dalam usaha memelihara kedaulatan

negara dan mempertahankan nikmat kemerdekaan ini. Justeru, sebagai kesimpulannya, khatib ingin menekankan intipati dari khutbah yang telah disampaikan iaitu;

Pertama: Nikmat keamanan dan kemerdekaan yang dikecapi selama ini wajib disyukuri kerana ia bukan suatu yang mudah untuk diperolehi.

Kedua: Prinsip Rukun Negara yang diisytiharkan adalah selari dengan ajaran Islam.

Ketiga: Setiap rakyat perlu menumpahkan taat setia kepada negara dalam usaha mencapai keharmonian dan kesejahteraan.

Cintailah negara kita sebagaimana Rasulullah SAW mencintai Mekah, tempat tanah tumpahnya darah Baginda sebagaimana sabda Rasulullah SAW:

مَا أَطْيَبَكِ مِنْ بَلَدٍ، وَأَحَبَّكَ إِلَيَّ، وَلَوْلَا أَنَّ قَوْمِي أَخْرَجُونِي مِنْكَ مَا سَكَنْتُ غَيْرَكَ

Maksudnya: “Alangkah baiknya dirimu wahai Mekah dan betapa cintanya diriku terhadapmu, seandainya kaumku tidak mengeluarkanku darimu, nescaya aku tidak akan tinggal selain daripadamu.” (Hadis riwayat Imam al-Tirmidzi)

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ،

وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي

وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،

فَأَسْتَغْفِرُوهُ إِنَّهُ هُوَ الْغَفُورُ الرَّحِيمُ.

KHUTBAH KEDUA

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ النَّبِيِّ الْأَمِينِ، وَعَلَى آلِهِ وَأَصْحَابِهِ الطَّاهِرِينَ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ.
 أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَاعْلَمُوا أَنَّ اللَّهَ أَمْرَكُمْ بِأَمْرٍ عَظِيمٍ، أَمْرَكُمْ
 بِالصَّلَاةِ وَالتَّسْلِيمِ عَلَى نَبِيِّهِ الْكَرِيمِ، فَقَالَ اللَّهُ تَعَالَى: ﴿إِنَّ اللَّهَ وَمَلَائِكَتَهُ يُصَلُّونَ عَلَى

النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾
 اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ كَمَا صَلَّيْتَ عَلَى سَيِّدِنَا إِبْرَاهِيمَ وَعَلَى آلِ
 سَيِّدِنَا إِبْرَاهِيمَ وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ كَمَا بَارَكْتَ عَلَى سَيِّدِنَا
 إِبْرَاهِيمَ وَعَلَى آلِ سَيِّدِنَا إِبْرَاهِيمَ فِي الْعَالَمِينَ إِنَّكَ حَمِيدٌ مُجِيدٌ.

وَارْضَ اللَّهُمَّ عَنِ الْخُلَفَاءِ الرَّاشِدِينَ وَعَنْ بَقِيَّةِ الصَّحَابَةِ أَجْمَعِينَ، وَعَنْ التَّابِعِينَ وَتَابِعِي
 التَّابِعِينَ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ وَارْضَ عَنَّا مَعَهُمْ يَا أَكْرَمَ الْأَكْرَمِينَ.
 اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ.

اللَّهُمَّ أَيْدٍ بِدَوَامِ التَّوْفِيقِ وَالْهُدَايَةِ وَالصِّحَّةِ وَالسَّلَامَةِ مَلِكْنَا كَبَاوَهُ دُوْلِي يَغْ مَهَا مُوْلِيَا
 سَرِي قَدُوْكَ بَكِيْنْدَا يَغْ دَفْرَتُوَانِ اَكُوْغْ، السُّلْطَانِ عَبْدُ اللَّهِ رِعَايَةِ الدِّينِ المِصْطَفَى بِاللَّهِ
 شَاهِ ابْنِ المَرْحُوْمِ سُلْطَانِ حَاجِ أَحْمَدِ شَاهِ المُسْتَعِيْنِ بِاللَّهِ.

وَكَذَلِكَ كَبَاوَهُ دُوْلِي يَغْ مَهَا مُوْلِيَا سَرِي قَدُوْكَ بَكِيْنْدَا رَاجِ فَرْمَايسُوْرِي اَكُوْغْ،
 تُونْكُو (Tunku) حَاجِهِ عَزِيْزَةُ أَمِيْنَةُ مِيْمُوْنَةُ إِسْكَنْدَرِيَّةُ بِنْتُ المَرْحُوْمِ المِتُوْكَلِّ عَلَى
 اللَّهِ سُلْطَانِ إِسْكَنْدَرِ الحَاجِ.

اللَّهُمَّ احْفَظْ عُلَمَاءَهُ وَوُزَرَءَهُ وَقُضَاتَهُ وَعَمَّالَهُ وَرِعَايَاهُ مِنَ الْمُؤْمِنِينَ وَالْمُؤْمِنَاتِ بِرَحْمَتِكَ
 يَا أَرْحَمَ الرَّاحِمِينَ .

اللَّهُمَّ اجْعَلْ بَلَدَنَا مَالِيزِيَا آمِنًا مُطْمَئِنًّا، سَخَاءَ رِخَاءٍ، دَارَ عَدْلِ وَإِيمَانٍ، وَأَمْنٍ وَأَمَانٍ،
وَسَائِرِ بِلَادِ الْمُسْلِمِينَ.

اللَّهُمَّ أَعِزِّ الْإِسْلَامَ وَالْمُسْلِمِينَ ، وَدَمِّرْ أَعْدَاءَكَ أَعْدَاءَ الدِّينِ وَأَنْصُرْ مَنْ نَصَرَ الدِّينَ ،
وَاخْذُلْ مَنْ خَذَلَ الْمُسْلِمِينَ، وَأَعْلِ كَلِمَتَكَ إِلَى يَوْمِ الدِّينِ.

اللَّهُمَّ ادْفَعْ عَنَّا الْبَلَاءَ وَالْغَلَاءَ وَالْوَبَاءَ وَالْفَحْشَاءَ وَالْمُنْكَرَ وَالْمُحْنَ وَالْفِتْنَ، مَا ظَهَرَ مِنْهَا
وَمَا بَطَنَ، مِنْ بَلَدِنَا هَذَا خَاصَّةً، وَمِنْ بُلْدَانِ الْمُسْلِمِينَ عَامَّةً، إِنَّكَ عَلَى كُلِّ شَيْءٍ قَدِيرٌ.
اللَّهُمَّ إِنَّا نَعُوذُ بِكَ مِنَ الْبَرَصِ، وَالْجُنُونِ، وَالْجُدَامِ، وَمِنْ سَيِّئِ الْأَسْقَامِ، يَا أَرْحَمَ
الرَّاحِمِينَ.

Ya Allah! Dengan sifat-Mu Yang Maha Pemurah dan Maha Mendengar! Engkaulah yang Berkuasa atas tiap-tiap sesuatu. Kami hamba-Mu yang lemah merayu kepada-Mu agar Engkau angkat dan hilangkan segera wabak penyakit Covid-19 yang sedang melanda kami agar dapat kami melaksanakan syiar-Mu dengan sempurna. Hanya kepada-Mu jua Ya Allah, tempat kami mengadu dan memohon pertolongan.

Ya Allah! Jadikanlah kami dan keturunan kami orang-orang yang istiqamah mendirikan solat secara berjemaah. Sesungguhnya hanya kepada-Mu jua Ya Allah, doa kami mohon diperkenan dan diterima.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ،

﴿ إِنَّا لِلَّهِ يَا أَمْرُ بِالْعَدْلِ وَالْإِحْسَانِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ

وَالْمُنْكَرِ وَالْبَغْيِ يُعْطِكُمْ لِعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ
وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.